

Na osnovu člana 205. Zakona o osnovama bezbjednosti saobraćaja na putevima u Bosni i Hercegovini („Službeni glasnik BiH“, broj 6/06, 75/06, 44/07, 84/09) ministar komunikacija i transporta Bosne i Hercegovine donosi

## **NAREDBU**

### **O HOMOLOGACIJI PNEUMATIKA**

### **ZA POLJOPRIVREDNA VOZILA I NJIHOVE PRIKOLICE**

#### **I PODRUČJE PRIMJENE**

##### **Član 1.**

Novi pneumatici konstruisani prvenstveno, ali ne samo, za traktore za poljoprivredu i šumarstvo (motorna vozila kategorije T), poljoprivredne mašine (motorne i priključne), priključna vozila za poljoprivredu, koji su obilježeni simbolom brzinske kategorije koja odgovara brzini od 65 km/h (“D”) i nižim moraju biti homologovani u skladu sa ovom naredbom.

Ova naredba se ne primjenjuje na pneumatike konstruisane prvenstveno za druge svrhe, kao što su:

- upotreba u građevinarstvu (“Industrial”, “IND”, “R4”, “F3”),
- mašine za zemljane radove,
- industrijske mašine i viljuškari.

#### **II ZAHTJEVI**

##### **Član 2.**

Jednoobrazni uslovi za pneumatike iz člana 1. ove naredbe koji podliježu ispitivanju, metode ispitivanja, način vršenja kontrole saobraznosti serijske proizvodnje sa homologovanim tipom, postupak i način uzimanja uzoraka serijske proizvodnje, sadržaj izvještaja o ispitivanju radi izdavanja saopštenja o homologaciji, izgled homologacijske oznake i obrazac saopštenja o homologaciji dati su u Jednoobraznim propisima koji se odnose na homologaciju pneumatika za poljoprivredna vozila i njihove prikolice (Pravilnik broj 106 Ekonomske komisije za Evropu Organizacije ujedinjenih nacija, u daljem tekstu: ECE pravilnik br. 106), sa važećim izmjenama i dopunama koje je prihvatila i primjenjuje Bosna i Hercegovina, donesenim na osnovu Sporazuma o usvajanju jednoobraznih tehničkih propisa za vozila sa točkovima, opremu i dijelove koji mogu biti ugrađeni i/ili korišćeni na vozilima sa točkovima i uslovima za uzajamno priznavanje dodijeljenih homologacija na osnovu ovih propisa (“Službeni glasnik Bosne i Hercegovine”, broj /2010).

ECE pravilnik br. 106 u izvornom obliku (na engleskom jeziku) dostupan je u Ministarstvu komunikacija i transporta Bosne i Hercegovine, odnosno kod organizacije određene za obavljanje administrativnih poslova u oblasti homologacije.

#### **III HOMOLOGACIJA I ISPITIVANJE**

##### **Član 3.**

Homologacija pneumatika iz člana 1. ove naredbe vrši se na uzorcima tipa obuhvaćenim ovom naredbom.

Homologacijska ispitivanja pneumatika iz člana 1. ove naredbe može provoditi samo laboratorija ovlašćena od strane Ministarstva komunikacija i transporta Bosne i Hercegovine.

#### IV PROVJERA USKLAĐENOSTI

##### Član 4.

Provjera usklađenosti vozila sa zahtjevima ove naredbe provodi se prema postupku koji je propisan Pravilnikom o homologaciji vozila, dijelova, uređaja i opreme vozila („Službeni glasnik BiH”, broj 41/08).

Pri provjeri usklađenosti vozila prihvataće se homologacije dodijeljene u skladu sa serijom (serijama) izmjena i dopuna ECE pravilnika br. 106 prema Odluci o najnižim tehničkim zahtjevima za novoprodukcijena i korišćena vozila pri homologaciji tipa vozila i homologaciji pojedinačnog vozila, koju će donijeti ministar komunikacija i transporta Bosne i Hercegovine.

#### V PRIMJENA

##### Član 5.

Ova naredba stupa na snagu osmog dana od dana objavljivanja u „Službenom glasniku BiH”.

Ministar

.....  
mr sc. Rudo Vidović